

四庫全書

集部

欽定四庫全書

集部

五百家擣芳大全文粹卷四十二

詳校官編修臣謝振定

助教臣常循覆勘

總校官編修臣王燕緒

校對官中書臣李荃

謄錄監生臣張護

欽定四庫全書

五百家播芳大全文粹卷四十二

宋 魏齊賢

葉 茶同輯

上啟

赴任

赴任上留守參政啟

王清仲

龍墀入侍峙八柱承天之功魚鑰分司鎮五馬渡江之

地以弓刀之微賤望旄鉞之尊嚴仰通姓名偕陳竿牘
恭惟某官學尊一代文妙諸公元龜天地之機識參與
蹟神鼎社稷之鎮德冠倫魁超然追古人風允矣有天
下量謀猷入告小奏牘之三千樽俎折衝富甲兵之百
萬鞠躬事主正色立朝蚕翊贊于泰階用經綸于洪業
式是百辟茂庶績之熙成惟茲四人賴同心而協輔遽
奉身而勇退乃與道以偕行邃殿陛華彌章異數大廷
孚號寵畀溫言念此留都實惟巨屏獨當一面坐控十

連虎踞龍蟠地獨上流之據風飛雷厲威先重望之臨
肅然鐵騎之萬屯屹若金城之百雉茲謀元帥爰付我
公分正東郊如周君陳卧護北門若唐裴度山川改觀
草木生輝姑惟說禮以敷詩行即經邦而論道高牙大
纛雖一時煩卧治之勞袞衣繡裳而四海起公歸之詠
佇膺泥紫以資汗青某稟性顥蒙賦才庸瑣業本箕裘
之紹分惟鉛鑛之材雖務守於廉隅顧寧逃于瘞曠自
甘株守偶及瓜時執吏役于塵埃之間望星躔于霄漢

之上忝爲屬吏大慰平生庶幾思之以圖其終安得食焉而怠其事念河潤百里海潤千里知均沐于恩波然人有一天我有二天願永棲于仁庇

赴任上政府啟

沈守約

屈指十五年之去國望天愁絕于覆盆扶親八十二歲而之官奉檄喜深于折屐既板輿免道途偃薄之患致門墻得階墀步武之登已抵厥官敢布所蓄竊惟忠孝之不並立蓋以出處之難兩全姓名纔入于公門進

退豈由于私已東西南北則惟上之所命死生患難則見義而必爲人誰肯棄于吾親事乃多違于素志溫嶠絕裾而去母能自安乎周處從戎而辭親胡寧忍此是以茲事之不易盡觀夫從古而率皆然讀陟岵行役之詩至今尚且流涕想登嶺瞻望之意何人而不動心故徐庶思老母之見留則委蜀主而求去王陽念先人之遺體則捨益州而徑歸若未能以義而斷恩則烏得徇忠而違孝顧某今日之所處猶比昔人而甚難重惟殘

生追念疇昔粵自孩童之始已興慈父之悲惟母伶俜
撫已孱懦既不繕農工商賈之業况又當流離奔竄之
餘不堪懸磬之一家相對過駒之二影爐嗟絕火度幾
臘之窮寒釜歎無煙常終朝而併食時斷髮以給賓客
之奉多織履以供學校之資孜孜撫養之勞切切溫飽
之望手和熊膽俾咀嚼以助勤面付羊裘使樵蘇而力
學天憫饑寒之極君頒廩稍之恩謂一命于仕途可終
身而祿養奈此冥頑之質昧夫趨向之方命既壓于人頭

困直臨于老境非無攀躋而分寸不上用盡氣力而本處不離既造化分定以何尤惟鞠育恩深而可念惟茲耄耋之母可謂喜懼之年朝聞北堂而眉暫展于萱容暮跂西山而瞻屢驚于夕照念養口體之方在輸犬馬之力則嘗珍羞之日宜倍甘旨之供雖五鼎之進未足爲豐奈半菽之求每憂不給蓋以三紀之出仕歷時非不多而四任之微官所入寧有幾身居蓬草之下心動蓼莪之思扣地無從仰天以訴豈不念禮經之訓是豈

當從仕之時固宜就隱于山林庶不暫離于閨闥然介推
綿上之田無有而安仁園中之景久荒要思娛親未免
從宦此前輩以求退爲甚易而小已以不仕爲可憂仰
荷上恩之洪深得從愚夫之安便已幸去家之近且叨
分職之間暇日則子職可修得免倚門間之望朝發而
其夕可至更無負道塗之虞況尚賒二載之戍爪而忽
戒一朝之行李既畢事親之願敢忘奉上之心一入修
門恍如昨夢再經故迹始覺更生仰首樞庭依舊台星

之兩兩廻頭槐市仍前樹子之陰陰已無丹青法令之庭
尚認紅腐教倉之處不謂去家之鶴再隨振羽之鴻雖
人喜劉郎之復來而自笑馮唐之已老念茲流落遠外
之既久所謂險阻艱難之備嘗惟其操心而甚危故知
有過而必改少年習氣既隨烈焰以無餘老去情懷惟
履薄冰而知懼倘既往而不咎當惟新而是圖上思移
忠次期報德恭惟大丞相以建治安爲事業以收人才
爲規模既廣博以能容且甄陶而有序厥今光明俊偉

之傑已居造化網羅之中人心既諧功績乃著次施洪
惠俯及陳人將欲令巨細以兼收故不問舊新而率錄
謂欲責其忠報必先盡其私心是雖木石之頑尚猶知
感況在溝瀆之久寧不懷恩其敢不念休復之良艱思
再來之不易勉而摩厲謾爾激昂燕語定新巢已得棲
身于廈屋嚶鳴遷喬木方將託命于春工祈望之私敷
宣固既

赴任上王帥啟

趙寶文

四岳崇高念瞻巖而莫遂一官冗散望賜履以來歸名
奔走于輶車實造參于幕府載循末路足厭平生恭惟
某官道應泰亨體包坤厚問萬事而必理國有元龜貫
四時而不凋人知喬木會精神于一德萃富貴于達尊
聽履上星辰內聳漢庭之議望風解印綬外揚冀部之
威方聖治之計安宜公歸之圖任豈繫霖雨猶間甘棠
化秀民于諸生雖有資于常袞舉明主于三代終無易
于王陽倚聽絲綸即登廊廟某少踈翰墨長困塵埃想

前輩之風流自憐俗狀誦名臣之勲業殆若神人茲懲
傷錦之羞妄作畫墁之計敢期際遇獲在按臨人有一
天倍覺帡幪之厚河潤九里坐期枯槁之蘇次紀且窮
教條方暇願尊和於六氣以來祉於百神

赴任上帥座啟

楊廷秀

輒耕作吏乃墮在步兵之厨柱笏拜庭將望見舍人之
樣雖文字不盡依劉之悃而仁賢獨無問李之心淒其
千載之逢或者片言之合恭惟某官名蓋當世文高前

修希武以趨雲霄蔚其未老孤忠之貫日月凜不可回
掌制西垣寓直內閣人皆以爲公喜公豈以爲已榮其
所以然有不在是以中興未成爲大戚以生民尚困爲
深辜今非無人誰有此意置之於湖山之遠了不聞知
行之以邊疆之寧是則談笑波靜郴江之沸天開衡嶽
之雲不惟蕃宣之勤實繫社稷之衛要之好手屈此外
邦曷若還歸于廟堂坐令整頓于宇縣某場屋百戰權
輿一官收飯山清苦之身託糟丘喧卑之地記醉鄉而避

世聊復優哉頌酒德以垂名直成狂者每顧初心而自歎猶幸大賢以爲歸必有異之于白眼之中未遽隔之于清流之外

赴任上呂帥啟

孫逢年

分玉節以奠南闕威初肅遡璇霄而仰北庭拜非遙以
簿領之甚卑而戍期之甫及在于天幸得以名聞恭惟
判官安撫龍圖大卿近日高蹕承天華閣建隆以來二
百載家與國以同休申公之後六七傳門有人而益大

嶽瀆鍾其間氣風雲溢乎壯懷就熟路而駕輕車一瞬
已騰于千里遇盤根而別利器萬牛力解于崇朝使星
卿月之交輝寶訓珍圖之荐直籌邊外塞鳴履周行迎
及無前既多多而益辦盈科必大斯表表以增奇帝懷
江右之憂民溪雲間之澤謀帥孰可召公亟行德星方
向于斗牛旄頭已盡天河雖洗于兵甲賴尾方隅令修
庭戶之間威著節旄之上湖山千里親若撫其室家臂
指十州寂無譁于風草第恐賜環之速靡容坐席之溫

某學則未優志非敢苟三試而收一第得之晚而僥倖已多二毛而竊半通取之艱而持循頗謹初縻吏役祇畏簡書雖渠渠夏屋之可依而凜凜薄氷之是履披雲霧而睹倘蒙少進于下風載日月而行其敢自欺于暗室誓竭挈鉢之智恭承制闈之嚴愛日御冬清霜履曉願集四時之福以均一路之民

赴任上安撫參政啟

劉共父

仰盛德之門牆久竊帡幪之庇分列城之符竹獲依節

制之尊撫辱瑣以知榮顧叨踰而增愧恭惟某官德格
上帝道覺斯民有經緯天地之文足以藻飾于百度有
折衝樽俎之武足以鎮撫于四夷出逢千載之辰自結
九重之眷頃收還于威柄首登用于真儒草衆弊于一
日之中躋萬俗于九天之上功既高而忌者衆身雖退
而道益光讒說翩翩曾何傷于日月孤忠挺挺自不改
于松筠益隆岩石之瞻久鬱簪紳之望方聖主興當饋
之歎而國人奚有袞之歸謝公合起于東山申伯尚分

于南服五侯九伯暫專鉄鍼之征一日萬機即正鈞衡
之任伏念某稟資固陋賦分羈單少學壯行妄意事功
之自見才踈智短終無尺寸之可書幸逃曠敗之誅更
冒超陞之寵一麾出守慙非共理之良十國爲連喜有
庇身之托偶承人乏已戌瓜期即懷綬以之官將叩閣而
假道望塵斂板行趨大府之風削楮濡毫敢貢小夫之
牘

赴任上越帥啟

鄭祐甫

一佛出世久慕義于中臺十國爲連偶叨榮于大幕爪
期甫及蔗境漸佳矧逢開府之初敢後沒階之進恭馳
函尺仰扣閣鈴伏念某鄭圃寒宗吳門晚出無異行間
之馬不能自振于箕裘且殊爨下之桐豈復有聲于硯
席力探黃卷眼看青燈慕夏侯之經非一師媿太冲之
賦成十稔三年漫尉半隨舉子之忙一擲成盧嘗冒興
賢之寵旋遭飲墨更切焚膏就有道以正焉必三薰而進
見聞某所有賢者輕千里以從游竭爲從事之初謀竊

利居官之寡務况雄藩寄委多卑碩儒而熒座密依庶
聞卒業魯男子善學下惠敢自信其操修左丘明親見
仲尼政未忘于博約誰知天幸忽播春溫綴甘泉之子
雲投鴻翊于蕭傳千巖增益交騰載路之驩一介預榮
獲遂平生之願恭惟某官佐王畧妙華國文高蚤魁三
蜀之英游直繼二蘇之偉望方紙貴洛陽之價已席形
宣室之思車府召來天錫範而初呈溫洛石渠辭去風
引舟而倏遠神山屈依劉表于荊州欣訪羊公于峴首

稍登輶傳開湖南刺史之天連貢叢封爲江左興王之地果峻陞于三院皆親擢于九重豺狼當道安問狐狸何止金吾之落膽鸞鳳之音必躡鳥鵠更蒙天子之改容未乘一馬之驄俄從屬車之豹五花妙制盡推大手之工四禁清班誰並黑頭之貴謂立登于要路何勇退于急流豈家住蓬萊未遠長安之日故仗辭閭闈聊快若耶之風疏榮更直于西清布政甫臨于東粵出當一面諒無黔突之淹入爲三公竚聽告廷之命某晞光府

幄屈指家林往承約束之嚴喜有憐憒之託園林之窮
勝事想未遑前輩之宴游幕府而省文書冀頻沐先生
之誨論

赴任上帥府啟

周茂直

結綬登畿舊嘗瞻于簪橐題輿佐郡今復隸于旄麾永
懷上國之游彌切高山之仰恭惟某官羽儀碩望藩翰
閥才氣儲五緯之英華識冠九流之津涉聽履星辰之
上嘗坐總于銓衡運籌帷幄之中猶與承于密旨彈壓

治優于天府斡旋計預于地官久殫告后之猷徒領牧
民之寄金陵天塹鍾阜龍蟠守鳳鑰以居留握麟符而
卧護民嬉樂土闢千里之耕桑身作長城壓萬屯之貔
虎佇席絲綸之寵復歸喉舌之司某久濶風猷幸依條
教賜屏以彰有德正賴隆麻持板而拜于庭願循故事長
贏在序庚伏云初斬加護以鼎羞用仰毘于睿眷

赴任上憲使啟

邵公濟

一官奔走久遠跡于英躔百里撫綏遂託身於德庇欲

紓寸臆宜貢尺牘恭惟某官直諒多聞清虛寡欲在簿
書而擅述作之譽處州縣而懷經濟之心果膺特達之
知荐歷清華之選棄麻蔽日去思深結于南榮固固生
塵惠政藹聞于西道暫移鄉部即秉鈞衡某山澤癯儒
斗筲小器偶攜毛義之檄獲宰鄭公之鄉鉛刀忽值
于盤根固難剝割駕馬親逢於良御尚冀騰驤瞻侍非
遙歡愉倍積和氣浩蕩化日舒長願益保于天真庶永

綏于福履

赴任上憲使啟

鄭敦夫

脂車工道跂望門庭斂板後塵行視履舄趨承有日
喜畏兼懷恭惟某官冠世真儒際天遠識吐談偉確稟
節聳稜持簡抗章鯁亮夙聞于烏府登車攬轡平反多
見于丹書恤欽弼教之祥刑宣布好生之大德必使無
訟不犯有司上推堯舜之深仁惟明克允坐享于張之
陰德俾熾而昌夫何直指之繡衣行即禁嚴之紫橐某
鯀生何幸鴻庇焉依膏叨一日之知私切二天之喜依

芙蓉而泛綠水晚進何堪披雲霧而覩青天當緣有素

赴任上憲使啟

高子美

佩符懷綏叨假守於部封斂板拜塵竦親承于條教即
功云始戴德惟新稱謝帡幪敢稽竿牘竊以內守外禦
周所資者八百國之諸侯訟理政平漢與共者二千石
之良吏故凡聲教之暨畢勤宵旰之憂眷此象臺邈在
駱越雖俗淳而事簡亦土瘠之民貧宰郡之求德賢爲
急自非集虞公之善曷能興賈父之歌如某者儒業甚

迂吏華不肆幾年場屋粗縛微官累載簿書久尸寸祿
惟志及哀親之養敢漫求擇地之安驟歷階升偶承人
乏蒞官行法徒知市獄之先循式按程稍寬檢身之易
所學若此何幸如之茲蓋伏遇某官衛上以忠服人以
德進竭匪躬之節居存濟世之心世信其言至輕千乘
之國時程厥效固賢百萬之師廸刑姑總于外臺熙載
即歸于中禁矧復忘勢以待士每期推恕以及人才也
養其不才故者無失爲故遂令非據亦獲所依某敢不

勉力撫循歸心知遇泥行露聽此時之訟揚扇風廣他日之仁雖戴蘇刺史天非敢私也或爲李將軍地庸有賴焉

赴任上漕使啟

周茂直

四戶攝承浸遠長安之日二車叨竊獲依刺史之天矧夙仰于聲猷今幸遵于條教未遂趨風之請敢伸詠德之誠恭惟某官博學海涵鉅材山立人仰斗南之譽望家傳江左之風流早歷亨途踐揚劇寄建外臺于一道

益高護漕之功結纍印于兩司兼懋平反之績才及坐
空于盤錯恩波偏被于荒蕪奉計嚴宸行上三年之最
陞華從橐併膺一札之頒某濫佐偏州叨承大庇賜屏
以彰有德尚繼前人持板而拜於庭願循故事長贏在
序庚伏云初願加列鴻之羞式副凝旒之眷其爲欣詠
曷究敷陳

赴任上漕使啟

冀實之

雁塔題名濫傳衣鉢熊轄假道曾拜旌麾人隅方慶于

勤拳解榻即垂于顧遇津津和氣發于眉宇之間亹亹清風借以笑談之款俯念棲棲之迹重興惻惻之嗟諭之以遇合有時勉之以少安毋躁自領聞于斯語實感激于中心富貴儻來不入清宵之夢寐名教可樂益遵前軒之典型倘非饑腸之所驅寧復寒蹤之在此十方常九潦難期卒歲之豐一髮引千鈞孰脫垂淵之厄豈意遭逢之幸迺在庶按之中仰惟大賢無所不容必以孺子或爲可教敢因始至用寫寸誠恭惟某官器韻出

于塵氛眼力窺于道奧才推王佐雖伊呂無以加之文
掞天庭何崔蔡所能及也振翼早騰于霄漢垂光獨耀
于虹霓名雖藉藉而遠聞心每休休而有裕曳杖歌商頌
妙旨自契于言端拄笏看西山爽氣盡歸于胸次風采
夙著于朝論姓名自結于主知欲持荷橐以列從班
先握蘭香而居省戶惟此重湖之險每貽當寧之憂爰
借真賢亟分重任一麾出守崇陰之蔽芾未移六轡巡
行原隰之光華已遠勢足搖于喬嶽節尤厲于冰霜劉

晏高懷雖洞明于取予范滂雅志深有慨于澄清既然
善最之登聞宜有嘉猷之入告紫泥溫厚佇迎召杜之
來碧落從容行踐禁途之密伏念某性惟語下才不及
中丞緣闕閱之恩得繼箕裘之緒書馬粗知五尾頗明
謹畏之方食蟹莫辨二螯殊乏疏通之識三登名于禮
部一冠選于銓曹駿駿兩紀之歲華汨汨六年之吏役
初期凌厲鶯遷木以高飛豈謂遭廻魚緣竿而莫上折
腰自歎顧影誰憐偶塵泮水之除喜有英才之育捨六

經濟者寡矣當令飽仁義不願膏粱招諸生立而誨之或可變瀟湘令爲洙泗雖誠心之有在非名德以疇依墜履遺簪倘或憐于舊物殘膏勝馥深有望于恩私俯首知歸據詞莫盡

赴任上渭使啟

楊公亮

皇華在道久聞范轡之澄清冗局備員將託蘇天之庇覆賓緣有自榮幸居多輒緘骫骳之文仰叙依歸之愫恭惟都運大中殿撰氣有所養而剛大學無不通而高

明若麟鳳之儀儀師師出爲世瑞如雷霆之磅礴隱隱振發英聲自結知于聖明即荐膺于委寄山陽假守人尚愛于崇陰淮右乘輶錢果流于地上旋陞華于秘殿爰易任于輜車矧江東水陸之衝實行闢股肱之地軍需仰給于調護邦儲尤賴于轉輸惟心計大過于人故課最無出其右一曰食而三見貨已稱低昂千斯倉而萬斯箱悉臻朽腐雖劉晏深明于取予而弱翁已結于眷知諒膺宣室之恩行慶甘泉之對某江湖寸梗泰華微

塵早以先君之賞延濫齒明時之仕版驅馳一尉蒞苒
三年繼即丁于家艱遂屏居于山谷屬再參于銓部偶
叨職于使臺敢云參蓮幕之賓游所幸得君子之承事
雖才能之攸取知卵翼之可期揣已奚堪捫心增愧
居有司出納之吝誓當竭於忠勤惟大臣教載之仁顧
不遺于微賤秋陽在候暑氣方驕願精五鼎之調式副
九重之眷胸懷所蘊筆舌難窮

赴任上漕使啟

孫逢年

岷峨之下有洙泗久欣慕于龍門牛斗之間借壁金令
敬承于虎節不腆簿書之職無因名姓之通天借幸于
及爪地可階而進牘恭惟都運殿撰舍人德卓於世才
全以天父子繼三蘇公以文章而擅四海兒童誦令司
馬約史記而成一家紬金匱石室之藏補竹簡漆書之
缺和其聲以鳴國家之盛編之何愧于詩書養真氣塞乎
天地之間晏然不採于藜藿頗倦神明之直少紓原隰
之華風檣萬艘之輸若流行于枕席湖山千里之遠如

遠撫其室家足國之外無窮民學古之中有美政見大
儒一調之手姑小試于設施執有司斂散之權可據充
于均節上既識尚書之履內方讀相如之文不日遄歸
承天作輔某有志殊淺無能可稱涉獵書林安知朝滿
夕除之慮牽聯仕版姑爲仰事俯育之謀方將沐霜露
于蒹葭其或蒸冀壤爲芝菌試吏之初百不習深祗畏
于簡書隨羣之後一無長願謹持子繩墨敢布躬先之間
亟修事上之儀由此而階冀顧盼于菲葑之采自今以

始發光華于枳棘之棲愛日御冬清霜履曉願恪歲寒
之護以膺夜半之招

赴任與同官漕使啟

缺名

游十閩之原隰嘗接後塵領二浙之將輸復聯高步雖
自慙于非據亦私喜于得躬伏惟運使寺丞仙韻邃清
神標凝峙毫端扛百斛之鴟胸次容萬頃之陂自歸漕
于日畿屢進倣于天陛蘇臺密邇比兼刺史之真符禁
苑邃深即第從臣之嘉頌其規模甚狹局韻尤拘挹愚

守迷與時既異投閒置散乃分所宜誤膺細字之十行
易典長安之三輔蓋資餘潤遂竊玷于光華更賴成規
庶稍逃于瘞曠

赴任與漕使啟

陳仲思

守拙杜門久卧桐孫之圃叨恩佐郡竭來荔子之鄉仰
由推挽之私更托帡幪之庇恭惟某官道窮閭域文富
波瀾持身凜剛毅之風接士見溫恭之色早冠天庭之
地獨深宸扆之知旋稅駕于杏壇復參籌于槐府清聲

謁謁要路駿駿獨當艱棘之時出領轉輸之寄蓋六龍
駐蹕地益重于全閩而四牡觀風恩獨榮于故里俯憐
踈賤曲賜吹噓某敢不益勵操修恪勤職守匪說于時
之譽庶逃竊祿之譏

赴任上運判啟

張即仁

仰八使于外臺久勤引領効一官于下邑將遂庇身敢
忘黃綬之卑仰具繡衣之間恭惟某官粹資玉峙雅量
淵渟讀八索九丘之書富三王四代之學早蜚聲于朝

序亟簉足于華塗繁要踐更英猷踔發暫領木牛之運
佇歸金馬之班惟江左之輿區乃日畿之近服舳艤銜
尾月富于天都流亡益歸歲增于民版諒亦假途于此豈
容坐席之溫倚俟詔條入陪國論某風埃俗子繩愆寒
生偶玷官聯獲備尉職顧巡察警偷之任敢不究心冀
寬宏逮下之仁少容駐近瞻馳之劇名遂奚殫

赴任上倉使啟

缺名

高名映世早思重趼之趨羈患隨人晚託後車之役一

行問道三沐彈冠撫志願以載欣仰威嚴而若厲恭惟
某官受才魁偉履道清醇稽古立言追兩京而無愧許
身經世羞五伯而不稱當神化之廓新與英流而彙進
啟嘉猷于素蘊寤聖意于立談志大氣剛卓肇治安之
表任重道遠雍容進退之間疇茲瑞節之行式示遠人
之寵哀烏環望共占使者之星衣繡巡行咸滋御史之
雨明詔既頒于寬大餘功坐致于富強實教膺于九年
胡爲罪歲幹海山于三倍于以裕民佇歌還歸之詩入

侍清閒之燕具散材天拙孤學日愚雁驚駢肩久成俗
吏星霜滿鬢可謂陳人不勝刺劇之憂妄意擇安之計
孰爲推挽乃備馳驅條教清通無倥偬簿書之患賓僚
左右有優游道德之間坐惟流落之餘獲此會逢之興
息黠有漸何殊畏影之就陰攘臂因功徒愧畫墁之食
志掃門伊邇懷刺惕然

赴任上監司啟

李西美

都畿近甸司隸要權蘭德芬芳顧趨風之已久蓬心激

切快披霧以何多喜溢乎情望踰于分伏念某天姿蹇
淺世系單微璧水波深早失化龍之便蘭宮風暖謾嗟
垂翅而歸幾將築室以反耕亦欲枕流而漱石再念清時
之難偶未甘末路之無成誓已決于焚舟功俄收于拔
轔濫叨一第於今四年暫綰青絲猥分綵棒政竊嗟于
匏繫廻報及于爪期遂使萍蹤迨依雲庇恭惟某官天
姿英特地胄高華武庫則矛戟森然隱如敵國文房則
禮樂盡在世不乏人全至潔以在躬慤純誠而與物九

重講聞于高誼四方咸仰于下風早膺天庭之知荐領
使華之寄輶軒雅望延閣華資揭察吏之六條頌宣風
於一道矧夙肯吳中之都會實今茲轂下之通津水陸
之交舟車所至姑試蕭何之饋餉式資管仲之魚鹽國
計已充民用不匱宜士心之所屬亦物議之攸歸况復
尺五之天復值歲十之運乃聖賢際遇之旦豈才德淹
留之辰併觀峻陞顯寘近侍某叨居縣掾虔奉教條質
庇護以云初借使令而敢後是用操持士檢佩服官箴

百不如人第守冰霜之節一行作吏願殫犬馬之勞

赴任上監司啟

方雲翼

恩叨屬吏名玷冗員揣分無能撫躬增愧竊以周家制
祿列下士于諸侯唐室建官置參軍于督府任小而責
重位卑而事詳千乘兵民之浩繁一方簿書之期會凡
屬郡政悉分掾曹宜得名流來膺妙選如其者受材樗
散賦性冥頑粗習藝文稍嫻德義斯未能信敢睇五府
之交書仕有爲貧思試一官而効智濫預省闡之優擢

更居名卿之下僚曾微三語之工亦在六司之列初安
吏局漸抗塵容無判事之能稱竊庇身之幸會此蓋伏
遇某官愚和育德豈弟處躬厚性足以鎮浮宏才優于
刺劇風旨颯屬城之觀聽條教綏庶俗于休寧寬裕存
心平均待物致茲愚陋獲託保全倦翼投林願借一枝
之蔭駕駘參乘勉思十駕之功某敢不磨鈍爲廉圖難
於易少逃官謗上答仁私



五百家播芳大全文粹卷四十二

欽定四庫全書

五百家播芳大全文粹卷四十三

宋 魏齊賢

葉 菜同輯

上啟

赴任

赴任上知宗啟

趙德莊

支封慾緬莫脩子姓之恭宦牒推遷乃邇宗藩之重指

牛車而夙駕仰星鉞以載輶豈無他人適有天幸恭惟
某官生知忠孝氣稟神明屬近且尊劉向嘗參於國論
才高而敏陳思獨擅於文盟早見器於內朝久服勤於
周衛簡素靡論於餘習燕安不見於惰容乃眷老成用
都屬籍珥戈十乘爰開督府之雄盤石四維式視陪京
之舊粵自表儀之正益知信厚之敦猗蘭增奕葉之芳
若木擁十枝之秀戚疎並建大賢方倚於宗師福祿同
休公子盍歸於魏闕某學雖為善智不亢身流俗殊鄉

早負五陵之氣低徊短豆晚慚千里之駒敢持綿蕞之
微自綴洪柯之末惟茲遇合實厭平生三族具依竊願
寄於河潤諸姬未遠猶思誦於棠華嗣歲且興清闕有
相益戒襟靈之御以迎戩穀之餘

赴任上總領啟

熊子復

一麾護塞愧薦玷於明恩九列總儲幸末聯於清庇望
崇墉而結想馳竿牘以控忱伏念某學術淺膚才資底
滯猥誤朝廷之選濫陪省府之僚奉聘幣於遐荒僅能

復命乘漕輶於粵甸方竊究心每懷汰斥之虞豈意褒遷之渥要藩任劇猥當節制之嚴延閣班清更直寶儲之邃載惟僥冒實自維持此蓋伏遇某官卓識際空英資邁往摛詞韶潤自老成之波瀾濟務疏通皆儒雅之緣飾早膺妙簡徧歷華途領餉雄藩未究經綸之蘊告猷中戾即膺宥密之除某既荷嘘枯敢忘磨鈍折衝而布方畧雖乏帥材撫俗而推教條尚圖吏績臨牋殊鬱望履猶賒

赴任上總領啟

仰卿月於外臺久勤引領忝仙曹於下邑將遂拜塵輒忘趨走之卑仰具起居之間恭惟某官星奎儲秀岳鎮炳靈文章差班馬之肩術業造軒雄之奧早翱翔於省寺暫出御於輶軒地已見於錢流物無煩於鞭計諒亦假途於此豈容坐席之溫即俟詔除入叅禁從某風埃俗子詩禮後塵偶玷官聯濫叨尉職披雲天而伊邇瞻榮戰以增勞企詠之深名言莫究

赴任上市舶啟

晁之美

瞻仰惟勤願趨風之已久攀依何幸快披霧之有因喜溢情端望踰意表伏念某質顓性室才散慮疏初無學業之工偶中功名之會叨塵一第待次四年適當筮仕之初遂獲依仁之便恭惟某官高才拔萃盛德邁倫應時而生系周恪神明之後間氣所孕跡漢朝社稷之臣暫領使權貳司寶貨確純誠而與物厲清節以臨人屬吏聳威商胡懷德况海不揚波之日當物無二價之時

人異俗而化齊言不通而心喻舟來如島貨積猶山實
物議之攸歸亦人心之所屬行當柄用以副輿情某職
典賦曹居叅縣掾近臨宇下何幸庇身進謁壇前皆諧
望履顧趨承之有自爰約束以云初某敢不欽服官箴
恪持士檢厲愚自勉濟拙以勤燕雀雖微功有期於庇
賴犬馬之力覲當有以驅馳

赴任上叅議啟

宋文淵

踰跋門牆每極瞻馳之意往官幕府獲依芘冒之仁內

顧辱微竊深喜幸恭惟叅議提舉人流超妙學業深純
典刑自得於老成儒雅克施於吏事任更中外益聞治
行之優勤累歲時未究真材之用尚茲左宦曷慰羣情
宜有詔除以稱譽處某宦游拓落舉錯迂愚獨以困於
食貧未免從於祿養不斷間關之役令茲挈負而行他
日從容倘侍笑談之燕此心冀望得親教誨之私奉以
周旋庶無罪悔寒臘欲盡陽春方興蘄益厚於保綏用
垂副於頌禱

赴任上總領啟

郭文紀

未窺巖電聳間實大以聲宏竊望軺星更仰芒寒而色
正豈意塾巾之胄叨陪入幕之賓將幸鳬趨預增爵躍
伏以司軍餉之儲者分重權於外寄踐使華之選者兼
異數於中朝阜錢穀於江淮之間壯威稜於邊境之外
必能裨贊於遠畧乃可趨承於下風如某者運蹇數奇
迂踈寡與忝在細侯之末裔愧無有道之餘芳幸由簪
履之遺終齒搢紳之列雖入侍固已越十年之久然在

官未能施一日之長偶膺巖廟之誤恩護玷輶軒之屬
吏重憐公麼曷稱使今茲蓋伏遇奉使總領郎中天畀
英姿世基厚德識照幾微而行之以恕學覃壺奧而炳
之以文贊祥刑於天下之平早擅臯蘓之譽課士行於
吳中之守更復名杜之稱宜入踐於郎曹仍出將於使
指佇加眷注旋被褒陞尚容熟究於規摹行即親承於
要束某方依玉節遽迫爪期佐蕭何給餽之功固難精
於會計慕劉晏揮鞭之算或少効於消埃頌詠徒深敷

宣閭既

赴任上太守啟

孫賓老

旌罄天遠久馳胡粵之心幕府雲開輒駐泥塗之跡眷
惟都會謹簡官能何自庸虛與陪參佐恭惟某官器藏
經濟道體中和出履泰亨之衢早攄高妙之策英飛漢
省勳列宿之寒堦化浹周圻流洪河之靈潤相持閩部
實首建安屈臨雖鬱於壯圖坐鎮聿光於遠俗耄兜相
慶撫榆本之既成廊廟所湏恐崇陰之徒在某才殊無

似志苟好脩不量固陋之姿將芘優容之德倚王儉之
重蓮依水以甚榮事南陽之賢魚泳川而何幸方脂轄
以問路即摵衣而造庭欽厥攸司尚或裨於毫髮及於寬
政祈少蓋於瑕疵頌詠深占言莫既

赴任上太守啟

李仁甫

絃歌分教誤領袖於諸生庠序主盟託幃幪於大府以
眇焉一介之賤有巍乎二天之臨在於進趨寧不奮躍
恭惟某官漢富平之懋烈唐曲江之遠猷窮聖域之淵

源誰其正派問相臣之衣鉢此有明謨奮遠業於一飛
之初騰偉問於羣公之右豈弟之政多出詩書精明之
才不欺銖兩乃眷初潛之邸再分共理之符袞襦一陶
簫勺羣慝力効已束何用此司空城旦之書波瀾不驚
安行乎青草洞庭之野嘯諾豐預壺觴從容翰墨之工
賴以品題湖山之勝借之彈壓兵衛森戟端未減燕寢
凝清香之歡川原開花妨賦遠近蒸紅霞之句顧此行
樂初非厲民即有益州宣布之詩用薦乙夜清明之覽

某器不遠到學非夙成賦蘭臺之風窘聿追於筆陣曝
茅簷之日倦欲老於牆陰雅諳昌黎蘊鹽之窮安得元
龍湖海之氣幸脫簿書之冗將尋文字之盟厚德不孤
病身有倚記坐間之小異雖莫之先與門下之旁求則
由此始敢據悃愞敬瀆高明霜辰晏溫歲序窮晚諒有
神明之默介不待吐納而致和

赴任上太守啟

王德立

望台躋於霄漢祗切依歸執吏役於塵埃深悚慄寧

道瀆尊之謹敢忘脩贊之恭敬布尺書仰通文席恭惟
某官諱參玄妙名冠倫魁叔玠謙冲於一日之長子陽
高抗於萬世之策靈懷子徹昭乎日月不足為明勁氣
橫流沛然江河莫之能禦值千載君臣之會見二難兄
弟之間玉燭揚明賴居中之燮理金城設險倚重外以
蕃宣爰分割竹之符姑燕凝香之寢尚冀京師之蒙福
宜專方面以分封肅導引之雙旌興歌謠之五袴暫紓
丈二之組而臨名郡即被尺一之詔而還近班擢南國

之龔黃為西清之頗牡丹墀青瑣賸馳萼集之文章紫
誥白麻旋備荷囊之顧問某質顓性室才散慮疎分隨
太史牛馬走之塵濫登正元龍虎榜之列叨塵仕版初
試尉曹敬仰鈞衡未足備兒童識君實之數恭承教條
適快覩朝廷用弱翁之時喜觀大丞相之家復見賢刺
史之職願託帡幪於廣廈妄希甄治於洪鈞安知今日
之趨承不為異時之際遇望潭潭之府行遂埽門瞻兩
兩之階益勤引領

赴任與隣守啟

張安國

諸父納交昔叨宋契近藩假守今託善隣將敬掣於齋
鈴敢精馳於書牘恭惟某官名高盤錯譽滿搢紳諫大
夫薦之公朝太上皇擢以名郡第循良之最獨為三輔
之光輸獻替之忠即參兩禁之密某已無善狀更誤寵
恩望廬山之雲既闕晨昏之養飲吳江之水敢為旬月
之圖欣近接於封圻將悉模於條教僕之所願如此公
其勿愛於言

赴任與隣守啟

耿元鴻

求間上印特承白髮之親閨冒寵移居更昇黃閣之輔
郡顧叨逾之云甚荷推假之居多恭惟判府直閣少卿
丈邁先秦之書筆追二王之法猶是正元之朝士合作
甘泉之從臣金雀上樓何久違於雙闕銅魚左佩第連
牧於五城比間苔雪之美謠行趣溫宣之嚴觀盍歸一
老可歎靈光之歸然同升諸公其在潁川之長者某屢
違台範濫守士鄉避堂而舍蓋公莫展事賢之禮載酒

而過揚子徒知通德之居曾貢記之未遑忽飛緘之先
辱惟深愧感莫罄敷陳

赴任上太守啟

王周士

名題雁塔歎平生骨肉之屯職忝鸞栖幸小邑簿書之
簡方茲筮仕偶獲依仁竊以智効一官雖君子不求其
備年踰四十在聖門幾至無聞矧當真人再造之朝允
謂炎厯重開之日朱幡皂蓋簡求師帥之賢墨綬銅章
妙極子男之選雖縻薄領米鹽之苛碎敢忘教條詔今

之頌宣顧非俊髦必蹈瘞曠伏念某學術甚淺家聲最
微筆以代耕仕而為養風櫓月牖久諳太學之蘊鹽金
箭銅壺憤聽帝城之鐘鼓欵欵可笑險阻備嘗人譏畫
虎之未成自歎屠龍之甚拙粉闡試藝幾及十上之勞
桂籍收名僅偕一家之末蹉跎壯齒蹭蹬窮途心耿耿
以尚存髮星星其如此孽頭鼠目自知進退之難鳳翼
龍鱗偶有攀援之便雖彈悵幅奚罄依歸恭惟判府學
士識洞安危學該理亂譽擅庭蘭之秀器標廟璉之珍

中外踐揚事功烜赫摘山煮海已彰富國之勲剖竹分
符益著宜民之政夷惠之清和格物貞衰之畏愛在人
衆欽廣漢之吏師士仰伯循之仕學坐鎮一圻之地潛
四方井之春田間無復於佩牛江外但聞於渡虎佇聽
鋒車之召即調金鼎之元敗鼓奚堪願入醫師之籠散
樗無用終勞匠石之斤雖徼倖於異時本夤緣於此日
祁寒在候冬律向深伏惟上為廟朝倍綏福履企屏墉
而尚阻罄精魄以交馳

赴任上太守啟

久仰龍章未踰登門之客分甘豹隱遽陪入幕之賓自
慙陋巷之孤蹤曷稱雄藩之佐吏况遂安之近服實新
定之名邦建節旄者分出使之華居廉鎮者重觀風之
任豈謂庸疎之質猥叨任使之聯揣已奚堪逢辰有幸
恭惟判府舍人氣涵剛大道稟粹精望高廊廟之珍才
挺甌闔之秀揚禮本大哉之間紹家學於孔門擅儒林
卓爾之稱傳世休於漢室方躡亨衢之始共推遠業之

優較執禮闈早冠南宮之多士摛文詞禁晚陪西掖之
清班暫均逸於殊庭遂復臨於舊境雖寵光再加於丈
二之組然時論同歸於尺五之天允為公輔之儲即被
釣樞之選某門風謗薄仕路遠遭効能無機線之長遇
事有鉛刀之割辛爪期之已迫望棠舍以非遙矯首駟
車預彈冠而爵躍歸心鈴閣將歛板以鳬趙慰抃徒深
敷宣罔既

赴任上太守啟

林豈座

風塵奔競恥為媚世之容藻鑑留連誤作掌搖之請將
有事指呼之役輒先脩咫尺之儀嘗謂古人仕宦之風
流初無俗吏趨走之況味單父之堂鳴琴而下治山陰
之門垂簾而自閒艷藻春摛賦詩桃李之下清襟泉潔
讀書松竹之林王夷父之終日清談夏侯湛之累年多
暇蓋吾儒緣飾之有術何後世標榜之無人某也窮歟
吏之愚者始辭撻楚聊歎絃歌雖前輩不可挹其風標
在今日焉肯隨其波浪陽鱣也鮒魚也固聞釣法之不

同繭絲乎保障乎亦知戶數之可損如其獻朴之喧囂
謀訟之倥偬與夫文墨之紛散簿領之沉迷若常苒苒
役夫思慮之中必欲每每決於耳目之際此一異此二
異此三異又安得政迹之可觀不能欺不忍欺不敢欺
曾未識賢才之有別倘公事凝為可了然人情老有不
堪苟折腰向小兒而羞或低頭負野人之愧上下既難
於俛仰去就曷權其重輕身局促以何依足趑趄而未
進誰為道地自有恩蒙茲蓋伏遇判府郎中道安深以

逢其原氣剛大而養以直青天白日景星北斗以昭乎
譽融風彩露慶雲光霓以舒乎文雍容謁帝之初醒籍
為郎之久南來而爛五馬莫榮乎佩二千石之印章登
庸而萃一門行見其傳六十年之衣鉢想佩刀而自成
氣象顧冠劍而待拂塵埃惟富貴必無相忘則貧賤在
所不棄某戊戌可往行李有期請通謁者爵里之書當
從鈴下威儀之後大而千里小而百里當益脩屬吏之
恭人有一天我有二天豈無望私恩之意預為欣躍曷

罄敷宣

赴任上太守啟

鄭顧道

恭承朝命來貳郡符當大賢懷綏之初屬賤子彈冠之日叨恩有自託庇惟新恭惟某官操履端脩器資閑達有慷慨憂時之志抱縱橫應變之材早拜寵於楓宸仍踐更於棘寺釋之持議可重振以家聲由也以言實兼資於儒雅猷為藹著委任彌隆一麾植荔子之邦千里被棠蔭之化當國步多難之日乃英雄入用之秋輿議

所歸咸跂鳳書之召邦人相慶暫私能軾之留某仰德
徒深依仁有幸仰睇崇墉之近俯勒單縠之馳飛誠輒
見於手書展禮將期於面覲

赴任與鄰守啟

史唐英

入覲中宸俄分外閫豈意專城之重任獲依鄰壤之餘
光懷綏云初非才為愧伏惟某官圭璋國器杞梓鄉材
文章班馬之流德行淵騫之亞居多踐歷茂著猷為粵
由德履之優深結聖神之眷繡衣出使屢膺臨遣之華

皇蓋行春復付蕃宣之重用寬乃顧允賴英賢矧擊柝
聞邾喜治聲之旁達而餘波及晉霑德化之橫流行被
褒喜入登禁從某慙戎湖外出守鄰封欣聯事以相從
幸伐柯之不遠徒守簡書之畏聊馳翰墨之私頌詠之
深敷宣罔既

赴任上太守啟代

胡仁仲

帥幕備貟初煩造化憲臺移命端託帡幪榮已踰於望
涯感良劇於情表伏念某性惟是古愚不知今踈若賈

生蔑有抗高之論陋同蔡澤自甘不相之資勉承教於父兄浪流心於筆硯一經較藝慙無黃綃好詞再世登科喜得青氳舊物才叨仕徑例抗塵容既流落於江湖復消磨於歲月四年試吏敢辭筦庫之勞萬里朝天謾有封章之獻何期上宰睠念寒生陳請力丐於便親從容得諧於佐幕無功叨祿撫已懷慙比因易闕而請行豈謂被旨而報可本難期於成事實有過於初心此蓋伏遇某官道廣能容德厚兼載愛獎每加於善類收憐

不到於小人夫何庸虛有此幸會某敢不冰霜潔志鐵
石持心雖不能裨堂上之竒顧敢効幕中之辦庶彈素
守少答鴻私

赴任上太守啟

王弱翁

原隰載馳認故國粉榆之境門牆數仞記昔年桃李之
陰矧績已著於大藩而望特隆於舊弼孤蹤何幸餘芘
是依恭惟判府叅政大資毓粹昭回儲精峻極學闡百
聖豈特軻雄之間道契兩朝蓋親見唐虞之際早推碩

望進翊繁機茲起鎮於名邦仍通班於禁殿清香盡戰
暫顯屏翰之權赤鳥繡裳佇正鈞衡之任初懷有負久
試無裨引弟子而起朝儀禮樂既師於先進質父老而
宣使指風俗稍諳於故鄉尚祈警誨之承庶免曠疎之
戾

赴任上李守左司啟

何子建

仰高山之景行莫稀大府之光芘廣廈以歡顏遽出附
庸之列指樂郊而問道懷漫刺以待辰所親懼失不任

有識聞而知免恭惟某官行為物表學探道真中立無
朋儼若正臣之體深藏不伐渾然君子之容樂憂一出
於為民獻替同歸於利國中臺建輅實參政事之原干騎
專城蔚為風化之首事業獨高於先進聲名晚見於後凋
惟時清明固聞內外乃借楚人之重暫持漢詔之溫播
以德音虛惠文而不用緣之儒術粲章甫以惟新甘棠
流憇以反陰秀麥連岐而効祉逮五月而政報信期年
之化遲增秩賜金雖曰循良之典濟川作醴蓋為經緯

之圖某學近俳優才踈簿領宦游不遂徒久客於諸侯
骨相多屯寢自窮於昭代敢厚誣而徼祿輒自詭以治
民眷茲傷錦之憂惕有飲水之患然而遭罹世故三為
江介之游出入里居屢閱風土之變使之推廣二千石
之美意毋失三百戶之常心因其好惡而罷行守以儉
勤而取予行其少學雖莫逮於絃歌奉我寬條尚不專於
刀筆春陽煥休兵衛靖嚴願綏六氣之和以介百神之

社

赴任上太守啟

朱子淵

仰函丈以趨風久願參於御者遵樂郊而問禁方有請
於候人雖漫仕之崎嶇亦窮途之遇合敢邀芘賴自列
姓名恭惟某官間氣清明英猷宏遠孔門高弟獨推叔
度之風漢代名臣無易大公之政早策勲於後域寢飛
譽於周行當法宮親事之時膺大邦維翰之寄德音四
布如臨魏闕之光風化一新坐變閩人之俗佇聆暮召
入告辰猷某拙與命謀學無師授買山退處歸失故鄉

結綬拜趨習成俗吏寸技靡聞於成事一官甘意於隨人乃眷名城舊陪末掾紅蓮渌水老人賓客之賢盡戩清香夢想風流之勝窮陰漂若坐嘯裕然願宣六氣之和以介百神之恥

赴任經由與袁守啟

高子美

願識荊州未登門而披露得官桂嶺將假道以趨風豫謹書郵仰承記室時屆朱明之盛物迎長養之宜惟豈弟以臨民有吉祥之來舍恭惟某官道德者舊文章宗

師射策楓宸掃千軍而獨立占名桂籍問二人而特優
屬資帷幄之謀擢贊樞機之地朝廷倚以為重天下想
見其風暫分漢室之優條綱並立遠繼韓公之治聳望
相輝矧以優游恬淡之心更廣潔淨精微之教士歌於
學既因入國而可知賓至如歸亦聽出塗而皆欲會膺
急詔歸涉近班某乾坤腐儒造化遺物文場角逐僥
一時之功名皇路奔馳汨沒十年之塵土志方求於將
母恩遂畀於長民雖知三月之聚糧尚若百舍之重趼

夫何幸會獲出治封過見國僑期得如舊識者入覲鄭國非圖少加禮焉他所傾心尚容拜面

赴任上通判啟

林豈塵

奔走而在風塵徒為俛仰拔擢而宰山澗初乏才名將受命於簡書敢抒懷於竿牘竊以仕宦因時而為隱顯爵祿在人而有重輕稚川仙材也為丹砂而求勾漏之行淵明達士也恥斗粟而為彭澤之去周顥應鶴書而起北山未免於移文王喬化鳬鳥而飛太史徒聞於候

影雖未超乎塵俗之外亦終歸於吏隱之中某易智反
愚背巧益拙嘗觀古人進退之義益知今日進退之難
桑梓相鄰願負百里之米松菊未種欲為三徑之資每
自甘名位之卑懼或遭官長之罵由天而幸為地者誰
茲蓋伏遇某官學博而志宏才全而能鉅金百鍊而淬
其利玉三獻而寶其珍功名必致以自期富貴鴟來而
未艾以刺史之任姑居其半而君子之道未究所行贈
佩刀不許其辭美矣有公輔之望酌杯水將為之餞清

故得父老之心鋒車已見於趣還別乘豈容於俟駕某
捧檄而喜辨志以行烏鵲之飛必有所依牛馬之走自
忘其賤高天澄澈當為雲霧之披廈屋帡幪可知風雨
之托矜悰所冀翰墨難宣

赴任上通判啟

葛大受

慕德搖旌久仰仲尼之日月効官歛板行披樂廣之雲
天將遂鳬趨預深燕賀顧惟薄領佐乃民官雖尾羣僚
實闢百里素號糾稽之職尤為管轄之司敏速有聲當

得李金之一闕清華假道宜追徐浩之三遷倘非鴻漸
之資曷稱鳳棲之地伏念某簡編舊蠹塲屋陳人努力
一官強顏寸祿花磚紅藥起家已負於初心槐板綠袍
報國尚期於晚節夫何際會獲在按臨恭惟某官學貫
天人識淹今古措紳儀矩文行宗師暫領公輔之才榮
貳侯藩之政甘棠陰裏聊題仲舉之輿丹鳳池邊行作
傳巖之雨某備貟奔走獲聽指呼寒埃正賴於封培頑
礦尚勞於鐫刻願同黎庶被千里之仁風尚冀鷁鵠穩

一巢於德宇

赴任上通判啟

馬子才

叨奉宸恩獲承郡寄湖山千里慚非共理之良民社一
邦乃結同僚之契尚溪爪時之報遽先雲體之瞻伏惟
某官上智稟資中庸為德學既優於臚仕實亦茂於蜚
聲旋膺出綺之榮更侈題輿之寵某猥繇令使濫預分
符方虞浮食之饑敢意餘光之托請惟欣幸曷既敷宣

赴任上通判啟

吳仲權

抗塵走俗邈無望履之階披霧睹天徒積執鞭之願惟
貴賤自殊於霄壤故姓名莫徹於門墻豈謂誤恩叨榮屬
吏方頃依於盛德宜脩布於尺書庶幾視聽之嚴或以
忱恂而達恭惟某官風度凝遠德宇粹和言可法而行
可觀勇於義而果於德早陞廡仕綽有令猷吏事詳明
卓爾西京之循吏文章爾雅炳然三代之醇風爰膺上
聖之知榮貳大藩之政雍容郡國聊專半刺之權密勿
教條即奉十行之詔別膺峻擢式究壯圖某性既稟昏

材惟樗散早脫巾而筮仕因歛板以趨時素乏寸長豈有鶴鴻之望歸無二頃未忘鼠雀之求比赴調於上京濫乎民於下邑顧才踈而智淺當任重而責輕豈知竊祿位之方適有隸福星之照依歸有地欣托庇之匪遙慰喜無涯但憇風而自慶清商初戒大火漸流仰冀順時倍加調護

赴任上通判啟

王致君

彈冠而仕仰瞻別駕之屏星歛板而趨遽豁公堂之宿

霧天其與幸人以為榮敬奉尺書致恭文席恭惟某官
英標帝峙雅量淵淳文雅健而雄深德輝光而篤實才
非自耀粹然三代之風政不出竒坦若六經之旨薦誠
割鷄之手稔蜚駢雉之聲考功亟奏於楓宸錫命旋飛
於芝檢煌煌泥軾用彰賢德之臨奕奕佩刀已有公輔
之望山川改觀風月平分行進席於龍光寧久淹於驥
足同流王化謾煩千里之題輿還籲從班式副九重之
側席某性天不爽材地無堪分隨太史牛馬走之塵濫

登正元龍虎榜之列未閑吏事初試尉曹撻楚奚辭叨
贊一同之治帡幪有賴鼎依半刺之榮坐逃曠敗之虞
亶有趨承之幸高山仰德少償積歲之誠流水知音庶
幾今日之遇

赴任上提幹啟

跂仰賢猷久蜚英於槐市祗趨吏役行識面於荊州顧
為吏之維新知託麻之有自敬脩尺牘用寫寸誠恭惟
某官天所間生丈之司命書覽平生未見學參前聖不

傳混融天理於日用之常酬酢世變以時中之義地嚴
壁水表儀鼓篋之八千雲近蓬萊步武去天之尺五果
題名於雁塔宜促侍於龍墀尚煩婉畫之賓協贊中興
之業旋幹一時之邦計總持九路之利源惟地寶之不
遺斯泉貨之有裕孔子嘗為委吏下患不辭小官公家
之利無不為盡足國裕民之要賢能之舉不待次持經
邦論道之權某鉛槧腐儒箕裘末學分隨太史牛馬走
之賤濫登正元龍虎榜之科初試尉曹未閑吏事居有

面牆之患動多擿埴之虞所賴依仁少稽曠職何其幸也獲披宿霧於公堂又有甚焉願借餘波於天地

赴任上教授啟

綰青絲之綸方愧塵埃之俗吏坐絳紗之帳乃逢道德之真儒叨聯桂籍之名敬下芹宮之拜恭脩尺牘用寫寸誠恭惟某官讀萬卷書通百家學粹然出於正接游夏之淵源煥乎其有文爛卿雲之黼黻早蜚英於槐市旋擢第於楓宸有光鴈塔之題姑掌鱣堂之教簪纓敬

仰俱泰山北斗之高冠履從游有沂水雩風之盛聊居
領袖未究規模士雖就有道而正焉上念何相見之晚
也渙乎甚渥起先生於齊魯之間晉接維新致吾君於
堯舜之上某筆膏易涸學殖久荒偶濫竊於儒科顧仰
攀於賢躅禹門浪暖雖同比於魚龍莊海風高實殊飛
於鵬鶠疵賤祇趨於吏役尊崇欽仰於儒宗方跪聽於
誨音敢僭論於年契嘗憂駁雜類東方之不純師何幸
趨承將北面而稱弟子

赴任上教授啟

林儀卿

學業同門嘗服何蕃之義行宦游自地將親定老之襟
期苟非夤緣曷為交濟恭惟某官言到聖處文有古風
北海之掣鯨魚豈獨看翡翠苔蘭之上長途而騁骐驥
無復顧駕駘芻秣之間吾道得其主張多士有所矜式
孰謂廣文先生之官冷自許少室山人之價高呌閭闔
以排雲當受太守之薦上玉堂而有日詎容嘲客之辭
某窮不柰何仕非不得已十室之邑可使之宰未免不學

之譏一卷之書必立之師願間救失之教其為欣慕曷
罄敷揚



五百家播芳大全文粹卷四十三

欽定四庫全書

集部

五百家播芳大全文粹卷四十四

詳校官編修臣謝振定

助教臣常循覆勘

總校官編修臣王燕緝

校對官中書臣李荃

謄錄監生臣孫炯

欽定四庫全書

五百家播芳大全文粹卷四十四

宋 魏齊賢

葉 菜同輯

上啟

赴任

赴任與職官啟

趙德莊

功能無取輒自試於附庸號令所從竊願承於僚首敢

忘愚分用請下風伏惟某官杞梓良材珪璋令器文章
華國聊游戲於江湖術業康時姑剏材於州縣乃眷吏
民之慶會逢賓主之賢大祐褒衣信美風流之厚坐嘯
畫諾傳聞謠誦之驩當公道之甚夷適最書之連上近
而交薦大有特招某早以書生寢汙吏籍四方浪走莫
遂一塵之安千里竭來實為一徑之計惟是林巢之寄
尚緊河潤之餘渤海既清坐恐水衡之名陽山雖陋或
瞻從事之臨

赴任上判官啟

林豈塵

傾蓋如故曾留五里之亭盍簪勿疑辱在十室之邑矧
宗盟之同好諒宿世之有緣恭惟某官淵量冲凝牆宇
峻嶷家學本儒林之傳授鄉評高汝俗之品題棠影清
風笑伴黃堂之掾蓮花綠水獨榮紅幕之賓每雍容主
論事之籤豈濶畧涉占位之筆政聲騰達舉最居先三
年然後有成雖區區勞州縣之職諸公唯能引類當袞袞
從臺省之登某世事茫然宦情聊爾老厭長途之奔走

行依廈屋之幘幙臭味既同請結金蘭之好膏肓有疾願聞藥石之言欣忭何多敷陳曷既

赴任上推官啟

王清仲

姪宗奕煜仰瞻葛藟之綿儉幕春容喜見笑華之泛亶為際遇行遂趨承敬奉尺書敢通丈席恭惟某官銀潢粟潤玉牒聯輝江夏之畧而河潤之賢朱虛之忠而東平之善麟千年而一角聲譽卓然鳳五色而九苞文華燦若信振振之公子為蹇蹇之王臣方發軌於華途姑

借才於從事登樓興逸款秋夜以清談拄笏才高致朝
來之爽氣即膺薦剡妙簡宸旒擊水三千奮鵬程於溟
渤去天尺五隸仙籍於蓬萊某鉉槧腐儒箕裘末學分
隨太史牛馬走之賤濫登正元龍虎榜之科初試尉曹
未閑吏事居有面牆之患動多擿埴之虞所賴依仁少
稽曠職何其幸也獲披宿霧於公堂又有甚焉願借餘
波於君地

赴任與幕官啟

陳德明

四戶攝掌已莫裨於潤色二車叨寵將何助於承流幸
陪綠水之雋游庶協黃堂之靜治恭惟某官儒資敏効
吏術該明謀解雍容畫具聞於婉婉奏刀肯綮才素擅
於恢恢豈云淹州縣之勞行矣赴功名之會某夙叨華
貫濫佐專城儉幕多賢喜共承於嘯諾陳輿非據冀無
負於品題方為理橐之行首枉飛緘之間其為愧佩曷
罄敷陳

赴任上知錄啟

王周士

尉曹賤役行將筮楚塵埃間賓幕游英正在操持紀綱
地寶為際遇行遂趨承敬奉尺書敢通文席恭惟某官
摩雲閣閱揭日聲名文雄爭造化之工學奧洞天人之
隱靈根挺秀鬱然四十圍之參天健翮橫飛迅若三千
里之擊水即政途之赫奕姑府掾以春容纏纏清談乘
興登南樓之夜飄飄爽氣在笏對西山之期衆曹寧俟
於糾彈網目已聞於振舉羅石溫於幕下得頗牧於禁
中綠水紅蓮亟上判章之薦丹墀青瑣即持從橐之榮

某鉛槧腐儒箕裘末學分隨太史牛馬走之賤濫登貞元龍虎榜之科初試尉曹未閑吏事居有面牆之忠勤多撻埴之虞所賴依仁少稽曠職云胡不喜仰瞻從事之衫吾誰適從願入人倫之鑒

赴任上知錄啟

林豈塵

聲跡相聞初無一日之雅面目何在輒形千里之書夤緣蓋有自來寮采將為同好恭惟某官器局夷遠韵宇宏深蔚為皇裔之表儀姑作外臺之管轄獄市之寄勿

擾諒能體齊相之懷州縣之職徒勞想屢發梁生之歎
一郡之紀綱振舉六曹之風采聳聞陽春之名蓋尚於
寬和嚴霜之誅何妨於擊搏依紅泛綠眷陪入幕之榮
施紫紵青行席折圭之寵某動輒寢跋謾何操持餬口
而之四方失之拙宦折腰而為五斗難以自高遂盍朋
簪願承教樂

赴任上司法啟

王周士

順流而行北海即遂望洋挂笏而對西山將聞致爽亶

為際遇倍切忻愉仰布寸誠敬形尺牘恭惟某官令圖
經遠厚德鎮浮波萬頃而度量恢洪壁千仞而操持挺
特文妙穿於月脇名高揭於斗杓久仰踐揚盍躋清要姑
發詠梅之興即賡翻藥之詩為政寬仁遠步徐君之躅
斷獄平恕遠追韋氏之風並以劄聞即膺鋒召羅石溫
於幕下未究英猷得頗牧於禁中益隆睿鑒某質顥性
室才散慮疎分隨大史牛馬走之微濫登正元龍虎榜
之末叨登仕版謬試附曹始學入官勳皆撻埴不習為

吏居若面牆所賴依仁少稽曠職何其幸也獲披宿霧
於公堂又有甚焉願借餘波於君地

赴任上司戶啟

柱笏而對西山久聞致爽順流而行北海即遂望洋拜
履有期彈冠有慶恭惟某官才猷開濟德履粹溫丰神
寒露之玉壺節操中流之砥柱微言奧學遠探東魯之淵
源大冊雄篇素有西劉之氣象早折郊林之桂尚淹儉
府之蓮名高斗南之一人才冠河東之三絕少施霹靂

已見踐揚羅幕下之石溫升禁中之頗牧老子興不淺
方乘月以登樓國人皆曰賢即排雲而趨闕某質顓性
室才散慮踪分隨太史牛馬走之微濫登正元龍虎榜
之末叨塵仕版謬試尉曹始學入官動皆擿埴不習為
吏居若面牆所賴依仁少稽曠職何其幸也願披宿霧
於公堂又有甚焉願借餘波於君地

赴任與職官啟

陳阜卿

功能無取輒自試於附庸號令所從竊願承於寮首敢

忘愚分用請下風伏惟某官杞梓良材珪璋令器文章
華國聊游戲於江湖術業康時姑刺裁於州縣乃眷吏
民之慶會逢賓主之賢大祐寢衣信美風流之厚坐嘯
畫諾傳聞謠誦之驩當公道之甚夷適最書之連上近
而交薦大有特招某早以書生寢汙吏籍四方浪走莫
遂一塵之安千里竭來實為三徑之計惟是林巢之寄
尚緊河潤之餘渤海既清坐恐水衡之召陽山雖陋或
瞻從事之臨

赴任上寄樞密啟

王致君

叨塵使指出綺自天祗赴官朝驅車及境久聞善地素有絃歌之聲一入樵城知為賢聖之國親仁有自為幸方深恭惟至孝樞密大資柱石本朝準繩多士伊尹聖人之耦更吾天下之才塲屋高吟才壓東南之彥班行闊步秀傾冠蓋之羣雖德業由於世傳而雲霄乃其自致以大手筆馳文章之鉅術以名臣風發議論之詳明一言裁契於淵衷兩社已參於近侍凡爭事人主之前者

一出於正故立身朝廷之上者居無幾何迨此執喪確
然秉志推至性之有守屈成命於難困晏嬰食粥而居
廬謂之有禮閔子要經之服事其何以心仰止仁人足
為世法某趨風自昔去德有年惟昔先人受知前烈于
里命駕登吳會之門間一面披襟剗解梁之尺牘奉承
再世繩繩一心豈徒賤子之生復見公孫之貴當六條
之廉察加二司之浩繁智與年衰懼廢郎中之守恩容
世及亦惟宇下之依節兆聞秋氣纏流火願畧過哀之

慕俯循中制之宜禱頌之私敷宣固既

赴任上寄居參政啟

晁子西

猥被上恩致臨劇屬問途於境上與老言知休駕於里
中有大臣在拊躬自慶進記宜先竊以古之為邦政有
先務莫敢無人於子思之側未嘗不式於干木之間盡
其禮蓋聞其言敬其德所以訓其下而况廟堂之老近
居鄉黨之間籍其德望則足以化民承其風旨則足以
為政豈其迂拙乃此遭逢恭惟某官士之準繩國之耆

艾懷藏天下之智謀而居於五畝之宅收歛天下之法
式而寄於三里之城浩然而歸始知孔子之反魯淡乎
不出皆惜孟軻之居休儀刑可師習俗自美人皆成於
謹厚吏相戒於貪殘吾黨小子不知所裁盡持循於善
道子孫黎民亦職有利或安樂於故鄉顧刺史何幸之
多將鄙豐不勞而治某睽離固久就見匪遙雖念樂正
子之來未定舍館要事竒章公以禮乃重朝廷

赴任上寄居尚書啟

王清仲

跂慕儒宗久仰韓公之斗祇趨吏役行披樂廣之雲望履
有期撫躬自慶敬脩尺牘用寫寸誠恭惟某官鍾乾坤
閒氣之先本忠憲元勲之後仕流冠冕吾道權衡宣慈
惠和追古人風含洪光大有天下量書讀平生未見學
叅前聖不傳羞愧崑崙薄蓬萊卓爾清高之名節決汝
漢排淮泗沛乎浩瀚之詞文久矣踐揚藹然譽處早蜚
英於蘭省優被眷於楓宸綸誥揚庭深得舍人之樣繡
衣持斧暫分使者之權旋歸北闕之班即典東曹之選

寧使私書之盈几必題啟事以拔人屬天子銳於中興
借從臣倚以外輔肅臨近甸易鎮潛藩惟帝念茲特陞
華於邃閣奉身旁退乃均佚於殊庭未符四海之瞻依
益重九重之眷注出如綸出如綺佇聞玉璽之賜書用
作霖用作舟欽想金甌之命相某質顥性室才散慮踈
偶叨竊於儒科遂濫塵於仕版定交鉛槧未明處事之方
借路韋弦莫識禔身之要何期葵戌獲拜荆承虎節專嚴
常與編氓之籍龍門遂遠敢期下客之塵顧僭蹕之滋

多特寬裕之有素憐其懵若進而誨之庶幾君子之歸
當為國士之目一貴一賤勢雖遠於門闈三沐三薰心
已馳於墻仞

赴任上寄居寶學啟

周少蘊

穿相如之犢鼻久困糟丘提言偃之牛刀幸臨花縣欲
抒情素宜布緘膝恭惟某官氣蓋一時名高四海不借
譽於臺省親受知於冕旒出鎮邊城夷狄想聞其威望
陞華廷閣搢紳咸仰於風流雖居軒冕之榮尚有煙霞

之望杜門伏氣燕坐歡心奉香火於琳官久綿歲月秉
權衡於鼎立蔑介胸懷某山澤臞儒塵埃俗吏入某國
而知其教已歎儒風居是邦而事是賢行依德庇

赴任上寄居宗丞啟

久試何裨去尚乘於星傳舊游弗棄首特貺於雲緘念
素欽月旦之名茲益認歲寒之意伏惟宮使提舉宗丞
氣嚴而中裕體邃而外冲質言行於先王三者備矣悟
忠恕於夫子一以貫之道德乃其初心文章固其餘事

早預圖書之祕出分原隰之華雖勇退於急流尚立登
於要路養恬真館方益懋於遠圖獻可熙朝即還躋於
近列某也自憐踈拙益愧叨逾弛擔云初失先馳於柔
翰盍簪伊邇喜預激於卑悰

赴任與寄居主管啟

熊子復

誤恩起廢猥假一麾妙語過褒寵踰十部荷意勤甚省
躬缺如某者處世多奇與時寡合諫垣有玷每惟仁義
以敬王冊府無裨旋以語言而去國久自甘於閒散上

曲記於衰遲薦更南紀之麾後寓西清之職雖由坱圠
實藉吹噓伏惟某官氣節凜然聲華藉甚殊庭均逸尚
鬱於壯圖要路陞華即膺於明制深憐踈拙曲借品題
尺緘聊附於回翔寸抱但增於搖曳

赴任與寄居簿啟

林豈塵

聊爾宦游昔所謂吏隱神仙之地何其多幸適然居賢
者禮義之邦新奉有期私悰為快恭惟某官牆宇高嶷
波瀾老成三年之鳴驚人一第而徒恩子鯨魚可掣豈

容者翡翠於苔蘭鷹鸇不同未免栖鸞鳳於枳棘即僕
乏封之名宜需瓜戍之期某墨綬濫汙青袍誤著登堂
問政固願聞藥石之言學道愛人庶無愧絃歌之戲其
為欣抃曷聲敷陳

赴任經由與宋宰啟

高子美

遡德傾心跼伏阻瞻於芝宇之官假道馳驅將履於花
封償所願焉此其時矣恭惟某官天材粹美地望清華
宜致身於臺閣之中尚折腰於州縣之職牛刀游必暫試

剗裁龍劍埋光會看飛躍某業儒以老為吏甚踈丐藏拙於小邦多慙非據得見賢於大邑豫喜有虞風物方薰視履惟吉尚謹天和之育以符民望之勤

赴任與知縣啟

宣布教條花已繁於潘縣奔趨戍役爪正熟於葵丘將指日以參承輒遡風而依嚮仰通丈席敬布尺書恭惟判縣中大敦大粹和高明博達曲逆見志於宰社太丘平心於率人學術自為名家文章持其餘事搏九萬里

而風斯在下行得路於青天屠十二牛而少若發硎遂
收功於餘地姑墨綬銅章之綰即玉堂金馬之登自屈
飛鳬稔聞馴雉佇交騰於薦剡宜妙簡於淵衷君子學
道則愛人已播絃歌之化儒者在朝則美政少須綸綺
之頌某鉛槧腐儒箕裘末學分隨太史牛馬走之賤濫
登正元龍虎榜之科粗知讀書不習為吏單衣介幘謬
試尉曹盛德大名喜見儀矩敢不恭承嘉惠善事上官
庶幾思之以圖其終安得食焉而怠其事何其幸也行

披宿霧於公堂又有甚焉願借餘波於君地朔風應
律良月紀時祈請茵鴟之調式副冕旒之眷

赴任上知縣啟

高子美

考課為天下之最夙仰聲猷居邦事大夫之賢將諧志
願企琴堂而邇德叩記室以脩誠隆寒正謹於窮冬碩
哲宜膺於備福恭惟某官清規映古大雅不羣學通四
部之書才號萬人之傑儒林烜赫青雲得路於妙年仕
籍輝華絲捧收功於不日欲展經綸之業先揚惠養之

能豈徒循吏之稱追蹤史傳自是郎官之宰上應列星
別聽寵除亟躋華要某講聞高誼之久偶叨佐理之聯
顧從政之惟新未諳施設賴傾蓋之如故因可師承行
且圖之何其幸也望履非邈傾心尤勤尚保綏於天和
以增重於民社自餘頌祝罔既敷宣

赴任上隣宰啟

林豆塵

桃李成蹊竊慕絃歌之化桑麻接軫將同察寢之盟喜
非尋常幸則千萬恭惟某官學博游夏文麗卿雲收科

第若摘領底毬取功名如探囊中物方揚鞭於雲路聊
製錦於江城王喬之隨鶴翎想太史候雙鳧之影龐統
之淹驥足蓋治中非百里之才暫屈高名自有佳政當
以十旬而遠至何待三年而後成某銅墨該分簡書深思
馬能治都昌而化豺虎僅若落山陽以尹鼯猱梅早杏
遲雖各藉春風之力家貧隣富豈無望宵燭之光忻懌
既深敷陳曷罄

赴任上隣宰啟

便道之官適蹈桑梓之境同察異事密依桃李之隣喜
其可知辭所難喻恭惟某官漢宗儀表晉族雋英濃薰
換桂之文章高吐粲花之議論製錦姑煩於巨手揚鑣
尚屈於巍蹤武城而播絃歌未免半刀之笑太史而俟
車騎誰知鳬鳥之先特有天才藹聞妙政行據路津之
要遂為臺省之登某暫荒田園試宰山澗彭澤未及乎
少日浚儀何幸其同時庖人不能固難求越俎之代貧
女無賴庶幾希借燭之光欣忭益深敷陳罔既

赴任與丞啟

仰止士林之望識面無由居然宦牒之同論交有自非
人力致得我心期恭惟某官德宇粹夷文華炳蔚駕車
熟路知遠業の方興發刃新硎惜奇才之未試過委千
金之重退潛百里之間美竹溫蘭顧芬香之莫掩老槐
鳴水聊嘯咏以自怡時方急賢日冀異政某猥承銅墨獲
並茵憑當問道之未閒遽移書之下及珠玉在側敢逃
形穢之譏松柏後凋徒覩歲寒之託

赴任與簿啟

拓落一官雖為令尹而無喜色夤緣共事未見君子而有憂心敬脩咫尺之儀先致寒暄之間恭惟某官識度清雅襟懷曠遠揚綱儒學之林振步宦游之路至如詣習主簿或謂其徒者三十年之書但願識韓荊州人有所弗羨萬戶侯之貴聲名從此而大官職可卜其來姑煩經濟之才暫試勾稽之任區區州縣之職固非為大賢之容袞袞臺省之登當不在諸公之後某誤分銅墨聊

欲絃歌將同寮棠之盟復講詩書之好鸞鳳而棲枳棘
君豈為鷹鶴之如麕鹿以豐庖厨我未能豺虎之化願
言承教敢不盡心

赴任與尉啟

王清仲

仰跂芳猷念未諧乎御李夤緣薄宦迺有幸於依劉承
顏有期撫已增抃恭惟主簿中大卧樓逸韻倒峽雄文
十二車呈照夜之珍莫名至貴九萬里展摩空之翼何
礙橫飛暫淹經濟之才姑領糾稽之職事劇謾煩於一

閱學醇即遂於三遷喜河陽桃花之正繁見荆南杞梓之競秀顧百里豈大賢之路姑少需之被十行皆細書之文自此升矣某學非為已才不逮人分隨太史牛馬走之塵濫登正元龍虎榜之列未閑吏事謬試尉曹動多擿埴之疑居有面牆之蔽適代葵丘之戍迺同士會之僚賴有依仁庶無曠職第虞奮迅殆非枳棘之栖安得趨承向使芝蘭之化朔風應律良月紀時必加所養之經益茂維祺之介

赴任與尉啟

林豈塵

閩為一鄉夙有桑梓之敬甫分百里願同桃李之盟喜其可知幸則如此恭惟某官清襟映俗懿美軼羣黨間高月旦之評人物想風標之異富貴可以必致材業蓋其有餘來游宦職之場姑試神仙之吏空冀北之野正騏驥長鳴之秋祝伊闕之灘應灔澦雙飛之瑞行矣遠到壯哉自期某祿以為親仕不擇地適爪戍之欲往顧行李之未嚴少馳單騎之驅先奉雙魚之間傾蓋如故

將尋識面之求同官為察庶結盡心之好

赴任與尉啟

林豈塵

聲氣相同久重文章之價眉宇未見難忘名利之心偶有宿緣將為新奉恭惟某官耿介高俗卓犖徧人添前宇於題名得盈數於筮仕暫隨吏隱聊試仙才人言屈為是行公亦竟非所好上平原之表鷺鳥累百而不如祝尹闕之灘灔澦一雙而自下路津之據當自百里始臺省之登可為諸公期某文甚乎窮宦失之拙歎平生

之寡合幸同類之可求學而未優我固有面牆之謂政而不達君無為隣城之嗤欣慕既深敷宣罔既

赴任與監稅啟

趙承之

倦游書劍飽聞奇士之風漫仕江湖適奉末塗之契幸非自意喜至忘言伏惟某官胄出故家學該益友浮沉世俗不卑筦庫之勞跌宕功名竊笑儒冠之陋方弛張之並用雖俳側以無遺有如從者之淹實鬱輿人之誦佇期類舉亟取壯圖某猥以妄庸將承光潤顧心言之

未抒辱口占之已先多病早衰永歎薰葭之倚平生久
契庶幾草木之同

交代

憲使與交代啟

粉闡分直已興歎於後塵澤國按刑乃重來而繼踵事
緣幸會愧溢情深恭惟某官奧學洞微英風載德振元
祐六家之列想喬木之猶存誦河東三篋之書信老生
之莫及早蜚賢譽三錫名音賢關咸仰於儀刑政省實

資於詳練柳惠不以三公易介每從容於進退之間淵明寧為五斗折腰自勇決於歸來之賦雖屢將於使指必嗣請於真祠解組而歸大有光於吾道焚芰而出寧無意於斯人某夙忝從游申結契好雖稟質賢愚之有間柰何比年出處之畧同再上湘江子厚嘗言於夢得屢游吳會蘓公敢望於樂天分無竹馬之羣迎事愧鉛刀之再割交無棄舊義必告新見貾思齊尚丐芝蘭之馥愛人以德宜聞藥石之規良覩非遙陳言莫究

憲使與交代啟

祇膺刻牘榮鎮憲綱新命誕傳輿情胥慶恭惟交代某
官風猷凝遠學識淵宏早擢秀於英躔浸陞華於臚仕
飛芻輓粟雅推轉漕之才攬轡登車宜展澄清之志果
膺遴選俯按祥刑某浮食無堪備貟浸久夫何樗櫟之
散偶茲糠粃之前顧雖兢慙實為幸會矧是兵戎之際
或滋狴犴之多望公之來以日為歲庶幾仁哲誕釋於
煩冤亦俾懦庸終逃於罪戾瞻依之切敷述奚周

帥座與交代啟

張安國

五筦曠官已追黜幽之典三湘謀帥又叨使過之恩亶
為衣鉢之傳實出陶鈞之自伏念某奉身無術與世全
疎冥行於利害之途窘處乎讒謗之藪載從去國屢遭
作州率以五六月之間則為數千里之役精神耗於憂
畏筋力敝於奔馳忽去忽來固未免揷渝之鬼乍賢乍
佞獨柰何萋菲之人豈無二頃之可耕况復雙親之既
老方快盍簪之適弗因賜履之榮恭命而行懇辭不獲

茲蓋伏遇某官學窮聖蘊道覺先民羞崑崙薄蓬萊迥立風塵之表決汝漢排淮泗橫馳翰墨之場比收一笑之功遂殄陸梁之寇雖在公以為餘事然寬上之所甚憂肆予環而召歸當告冊而爰立即以所臨之巨屏俾之承學之諸生某敢不謹守規模益思策慮老吾老幼吾幼深蘄錫福之私步亦步趨亦趨難望絕塵之軌

帥座與交代啟

喜閱吏書幸緣交契英踵旅進早聯桂籍之游帥閫來

臨晚辱魚符之代永惟幸會但積兢慙伏惟某官經德
忱恂懿文炳蔚早踐揚於煩使久推揖於公言十國為
連方賴於蕃之重期年而化佇膺乃眷之求春序已闌
薰風載協方勤跋履尚此節宣

太守與交代啟

一臺貳事友義至深萬里合符心期如素聞先聲之近
止為美俗以欣然某恭惟某官行義有聞才猷不露自
奮身於學省至持橐於天官安恬馴致於功名篤實受

知於主相急流勇退矯習俗之奔馳大器晚成俟可為
之際會惟韜藏之事業已更歷於歲時胡為一麾未厭
羣議某推擗不去叨據已多無善狀以告新賴曠懷而
藏拙頌使君之德美歷舉見聞使舊治之人情先知風
化

太守與交代啟

疏恩中禁移鎮近藩朝渙初頒已著搢紳之賀民言交
慶佇瞻旌旆之臨欽聽先聲喜馳下悃恭惟某官體文

華國清望傳家進為朝著之羽儀出作儒林之領袖聲
猷振發早躋從橐之榮中外踐更久被宸旒之眷惟武
陵之望郡本湖右之要邦欲重鎮臨實資名德承流宣
化顧慙八座之崇論道經邦將待九重之邃某偶叨分
竹甚愧揚糠慕仰門闈敢貢誠於記史瞻迎道左行贊
善於邦人

太守與交代啟

剖竹分符久抱素餐之愧及瓜有日式資善政之才獲

忝交承竊深榮慶恭以某官商巖華胄宋世名家器度
恢宏澄不清而撓不濁謀猷淵奧事能應而物能名精
忠既被於主知業履用光於朝著乃由睿鑒出領郡條
一麾未及於鎮臨千里預歌於來暮惟是先聲之藉藉
遙知游刃之恢恢宣化承流豈獨最牧民之課救偏補
弊所幸蓋前人之愆雖穎悟之未遑茲蒙休之有漸其
為欣抃曷可名言

太守與交代啟

楊成功

講聞譽望積有歲時歷下分符已出吏師之後漢南守
土又居仁政之前惟事契之稠重實愚冥之幸會比於
道路獲接光儀蒙特異於眷存仍曲加於燕勞諭情至
厚曾何謝於古人處義甚高固可敦於薄俗違離未久
感戀交深亮惟得力之良甫及下車之始頒條多豫納
福甚隆伏惟某官積學內充懷材間出久更當世之用
自結明主之知博帶高冠入級班於九列輕車駟馬出
按郡乎百城方圖間燕之宜自請蕃宣之便佞性詔召不

待歲成更惟上為廟朝善綏寢餌禱頌之至敘述奚殫

太守與交代啟

史友文

寢命西垣分符東海言從吏役獲繼老成聞大國之風
得依餘潤告令尹之政功仰後塵恭惟某官體被中和
化流愷悌三年云遠曾無奉計之淹五月有成獨先報
政之速乃緣僥倖得預交承咏嘯諾之風流接差池之
步武剝煩市獄知游刃之有餘仍舊教條企伐柯之不
遠敢圖謙德先辱誨音感佩之懷敷陳罔既

太守與交代啟

李汝為

漢符出守符叨分竹之榮齊成代更尚遠及爪之日顧
苟安於辱瓊實借潤於交承輒介尺書少形寸臆伏惟
某官才周不器德厚含章君子哉若人大夫之賢者清
而潔已高懷貯秋月之明恕以待人和氣散陽春之燠
辭探理窟望蔚儒林早憑文字之三千亟奮扶搖之九
萬兆雲衢於鼎甲契月旦之輿言久著休聲荐膺臚仕
郎官應列宿嘗被寵於吳天刺史古諸侯顧維藩於郢

諸謂當思賈行遂徵黃尚俟鳳閣之經綸來掌鴛湖之
風月顧惟逸乘屈踵疲驂深慙糠粃之在前尤愧薰蕕
之同器承流宣化不妨聊布於中和更治考功當見歸
陪於密勿某自緣假道獲遂登門覘眉宇於紫芝已諧
慕願叨樽罍於北海復佩勤私帳粹表之久睽辛孤蹤
之肯繼後來居上竚觀異日之有為必以告新徒覲期
年之無補其惟嚮往曷既敷宣

太守與交代啟

周行可

仰膺風檢來鎮虎城遂令疎散之踪復與交承之契誠
未將於尺牘貺先辱於駢緘謙德尊光盈懷咸懼恭惟
某官風猷卓絕器識宏深學所用以皆宜才無施而不
當木牛流馬薦持節於轉輸熊轍隼旟屢分符於屏翰
自是平時之望著不待期月而政成坐席未溫台函已
促顧惟無似實素受知何期齒髮之衰猶有子孫之託
二十年之契闊再獲周旋百萬戶之生靈更相授倘
非棄常而捐舊尚幾掩過以匿瑕承教匪遙想風彌切

太守與交代啟

歸相君之舍早貪附驥之榮分刺史之符俯愧續貂之
詠恭惟交代某官赫奕五公之胄循良千里之師解十
二牛而游刃有餘取三百囷而食功無愧並奉璽書之
寵進陪夜席之前猥以孤蹤遂繼前躅韓荊州識面已
大慰於夙心楚令尹告新當率由於舊貫

太守與交代啟

高子美

仰高北斗念披霧以何階假守南州喜繼塵而有幸未

貢侍中之薄紙忽傳諫議之斜封祇服謙勤但深悚慰
恭惟某官萬石貴胄千卷名家純臣不墜於祖風遠量
復排於朝論薦由膾仕綿歷要途半刺分權夙載不空
之詠專城宣化令興來暮之歌麥已秀於兩岐河自潤
於九里會膺帝簡遄促公歸某也學陋才庸識暗術淺
一行作吏百不逮人偶逃涉筆之譏猥與分符之命始
華風於嶺表雖藉任君續善政於桂陽徒慙炎氏顧爪
時之俯及望芝宇以非遙伏惟馳情姑報五雲之子東

裝就道尚圖三月之糧夏日初長薰風解愠願謹寢興
之節益為民社之休

五百家播芳大全文粹卷四十四